

**Savaatillit nersutaatillillu inuussutissarsiuqarnerannut nanoqartalenera qanoq annertutigisumik ajornartorsiutaalersimanera, tamatumanilu tamatuma qanoq iliuuseqarfigineqarsinnaanera pillugu Naalakkersuisut misissuisitsissasut Inatsisartut aalajangiiffigisassaattut siunnersuut**

*( Inatsisartunut ilaasortaq Aqqaluaq B. Egede, Inuit Ataqtigiit)*

**pillugu**

**Aalisarnermut, Piniarnermut Nunalerinermullu Ataatsimiititaliap**

**ISUMALIUTISSIISSUTAA**

**Siunnersuutip aappassaaneerreqarnerani saqqummiunneqartoq**

Ataatsimiititaliaq suliarinninnermini kingullermik ukuninnga inuttaqarpoq:

Inatsisartunut ilaasortaq Nikolaj Jeremiassen, Siumut, siulittaasoq  
Inatsisartunut ilaasortaq Ane Hansen, Inuit Ataqtigiit, siulittaasup tullia  
Inatsisartunut ilaasortaq Michael Rosing, Demokraatit  
Inatsisartunut ilaasortaq Jens Immanuelson, Siumut  
Inatsisartunut ilaasortaq Siverth K. Heilmann, Atassut  
Inatsisartunut ilaasortaq Aqqaluaq B. Egede, Inuit Ataqtigiit  
Inatsisartunut ilaasortaq Hans Enoksen, Partii Naleraq

UKA2015-imi ull. 11. novembarimi siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Siunnersuutip nassatarissavaa savaatillit nersutaatillillu inuussutissarsiuqarnerannut nanoqartalenerata qanoq annertutigisumik ajornartorsiutaalerneranik, tamatumalu qanoq iliuuseqarfigineqarsinnaaneranik Naalakkersuisut misissuinissamut peqquneqarnerat.

Savaatillit nersutaatillillu inuussutissarsiuqarfiini nannut angalaartut qanoq iliuuseqarfigineqarnissaat pillugu maanna aalajangersakkat siunissami allanngortinneqarnissaannik kissaateqarnermik siunnersuut tunngavilersorneqarpoq. Siunnersuuteqartoq taamaalilluni isumaqarpoq aalajangersakkat maanna atuuttut sunniuteqarluangitsut inuussutissarsiummillu ingerlataqartunut navianartorsiortitsisinnaasut.

**Siunnersuutip Inatsisartuni siullermeerneqarnera**

Siunnersuut siullermeerneqarmat Siumumit, Inuit Ataqatigiinnit Partii Naleqqamillu taparserneqarpoq, taamaattorli misissuineq nunatsinnut tamarmut atuuttussanngorlugu annertusineqartariaqartoq Siumut isumaqarluni.

Demokraatit piniarnermut inatsisip allanngortinneqarnissaanik, taamaalillunilu nannut inunnut navianartorsiortitsisut siunissami toqunneqarsinnaanissaannik kaammattuuteqartut saniatigut siunnersuut itigartinneqassasoq Naalakkersuisunit inassutigineqarpoq.

Atassutip siunnersuut nangaanartoqartippaa partiillu siunnersuummut inaarutaasumik isumminnginnerani ataatsimiititaliamit suliarineqaqqaartussanngortinneqarnissaa inassutigalugu.

**Ataatsimiititaliap siunnersuummik suliarinninnera**

Nannut nunami aalisarnikkullu imartami Kalaallit Nunaata oqartussaaffigisaani eqqissisimatitaapput, naak nannuttassanut ukiumoortumik pisassiissutinik aalajangersaasoqartaraluartoq.

Nanoq nunaqarfimmi taassumaluunniit eqqaani angalaartoq inunnut uumasunullu uloriarnartorsiortitsisinnaavoq, tamatumalu saniatigut annertuumik toqqissisimajunnaartitsisinnaalluni. Tamatumani nannut savaatilinnut nersutaatilinnullu immikkut navianartorsiortitsisinnaanerat ataatsimiititaliamit assortorneqanngilaq, tassa taakku inuilaami inissisimasinnaasarmata, tamatumalu peqatigisaanik nersutaatit ukiup ilarujussua neriniarlutik nunaannarmiissinnaasarmata.

Nunatta kujataani savaateqarfiit eqqaanni sumiiffimmi nanoq ataaseq (1) ukioq manna nalunaarutigineqarsimasoq Aalisarnermut, Piniarnermut Nunalerinermullu Naalakkersuisoqarfiup siunnersuutip siullermeerneqarneranut akissuteqaammini paasissutissiissutigigaa ataatsimiititaliamit maluginiarneqarpoq. 2014-imi nalunaarutiginnittoqarsimangilaq.

Tamatumunnga atatillugu ataatsimiititaliap siunnersuut misissorpaa. Tassungalu atatillugu ataatsimiititaliamit oqaatigineqarsinnaavoq:

- Nannut inuit inuunerannut pigisanulluunniit navianartorsiortitsisut imminut illersortariaqarneq iliortoqartariaqarnerluunniit innersuussutigalugit toqunneqarsinnaammata.
- Aalisarnermut, Piniarnermut Nunalerinermullu Naalakkersuisoqarfik paasissutissanik katersivimmik 2012-imi ingerlataqalermat, tassani nannut takuneqartut nalunaarutigineqartut nalunaarsorneqartarlutik, taamaalillunilu tamanna nannut

savaateqarnermik nersutaateqarnermillu (nunarpullu tamaat isigalugu) inuussutissarsiuteqarnermut akornusersuisut ingerlaavartumik nakkutigineqarnissaannut nalilersornissaannullu periarfissiilluni.

- Nannut takuneqartut nalunaarutigineqartarnissaasa pingaaruteqarnera Aalisarnermut, Piniarnermut Nunalerinermullu Naalakkersuisoqarfiup tamanut erseqqissaatigilersaarmagu, taamaalilluni paasissutissaasivik sapinngisamik nutarterneqartarlunilu eqqortunik takutitsisinnaaqullugu.

- Nannut pillugit maleruagassanik najoqqutassanillu atuuttunik nalilersueqqinnermik Aalisarnermut, Piniarnermut Nunalerinermullu Naalakkersuisoqarfik aallartitsilersaarmat, tamatumani nalileeqqinneq Kalaallit Nunaata immikkoortortalersorneqarnissaanut siunnersuummik imaqartinneqassalluni. Ataatsimiititaliap isumaa malillugu najukkani pissutsit immikkut ittut, soorlu savaatillit nersutaatillillu inuussutissarsiornerminni atugaasa, iliuuseqarfiginissaat taama immikkoortortalersuinikkut periarfissaqalissaaq. Tamatumunnga atatillugu aalajangersakkat iluarsisat Savaatillit Peqatigiit Suleqatigiissunut (SPS) tusarniutigalugit nassiunniarneqartut ataatsimiititaliamit maluginiarneqarpoq.

- Aalisarnermut, Piniarnermut Nunalerinermullu Naalakkersuisoqarfik – misilittakkat ilisimasallu aqutugalugit – nannut inuillu akornanni siunissami aporaassinnaanerup pinaveersaartinniarneranut iluaqutaasussamik nunanik tamalaanik suleqateqarmat.

Aammattaaq ataatsimiititaliamit oqaatigineqassaaq nannut arlaleriarlugit qimaatittaraluarlugit inoqarfinnut utertuartut ("nannut ajornartorsiutaasut"-nik taagorneqartut) Aalisarnermut, Piniarnermut Nunalerinermullu Naalakkersuisoqarfimmit immikkut akuerineqarnikkut toqunneqarsinnaammata.

Tamanna tunngavigalugu siunnersuummut annertunerusumik oqaaseqaateqarnissaminut ataatsimiititaliaq pissutissaqarsorinngilaq, nannulli pillugit aalajangersakkat iluarsaanneqarnissaasa ilimasaarutigineqartup qaqugu naammassineqartussatut naatsorsuutigineqarnera siunnersuutip aappassaaneerineqarnissaanut akissuteqaammi takuneqarsinnaassasoq ataatsimiititaliamit qinnutigineqarluni.

### **Siunnersuutip aningaasaqarnikkut kingunerisassai**

Misissuisitsineq atorfilittamit ukiup affaanik sivilunerunngitsumik sulisinneqartumit naammassineqarsinnaasoq (250.000 kr. missaani) siunnersuuteqartumit oqaatigineqarpoq, tamannalu Naalakkersuisunit akerlilerneqanngilaq. Allatut naliliinissamut ataatsimiititaliaq pissutissaqarsorinngilaq.

**Ataatsimiititaliap inassuteqaatai**

**Ataatsimiititaliap isumaqatigiittup** siunnersuut **akuerineqassasq** inassutigaa.

Taama oqaaseqarluni isumaliutissiisumilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Nikolaj Jeremiassen  
Siulittaasoq

---

Ane Hansen  
Siulittaasup tullia

---

Michael Rosing

---

Jens Immanuelson

---

Siverth K. Heilmann

---

Aqqaluaq B. Egede

---

Hans Enoksen